

- केन्द्र सरकार साफ कीनो – देश मांय काचा तेल रो पर्याप्त भण्डार-पेट्रोल-डीजल री पूर्ति सामान्य ।
- मुख्यमंत्री भजन लाल शर्मा डूंगरपुर मांय जनजाति हलकां सारु विकास रा 1 हजार 900 करोड़ रुपया रा खर्च वाळा कामां री सरुआत कीनी अर पूरा व्ह्या काम जनता ने संप्या ।
- प्रदेश मांय सरकारी मोल माथे सरसों अर चणा री खरीदी सारु नाम मण्डावण रो काम 20 मार्च ऊँ सरु व्हेला ।
- प्रसिद्ध शक्तिपीठ कैला देवी रो सालाना मेळो आज सरु व्हयो – केई राज्यां ऊँ जातरु पूगण लाग्या ।

000

केन्द्र सरकार साफ कीनो है के देश मांय काचा तेल रो पर्याप्त भण्डार मौजूद है अर पेट्रोल-डीजल री पूर्ति सामान्य है । पेट्रोलियम अर प्राकृतिक गैस मंत्रालय री संयुक्त सचिव सुजाता शर्मा आज नई दिल्ली मांय कह्यो है के देश मांय काचो तेल जरुरी तादाद मांय मौजूद है अर तेल साफ करण वाळा सगळा कारखाना पूरा बूता माथे काम कर रह्या है । संयुक्त सचिव बतायो के डिलीवरी ऑथेंटिकेशन कोड रे जरिये गैस री टंकियां री पूर्ति लारला महीना रा 53 फीसदी ऊँ बध र 72 फीसदी व्हे ग्यी है । सुजाता शर्मा कह्यो के कालाबाजारी अर जमाखोरी रोकण सारु लगातार निजर राख्यी जा रही है ।

000

संयुक्त सचिव कह्यो के सरकार हालात माथे लगातार निजर राख रही है अर घबरावण री जरुरत नी है । वे जनता ऊँ घबराहट मांय बत्तो तेल नी खरीदण री अपील कीनी । बंदरगाह, जहाजरानी अर जलमार्ग मंत्रालय मांय खास सचिव राजेश कुमार सिन्हा खबरनवीसां ने बतायो के रसोई गैस भरयोडो जहाज शिवालिक आज सिंज्यां तांई भारत पूग जावेला, जद के नंदा देवी पोत काल पूगेला । वे कह्यो के संयुक्त अरब अमीरात ऊँ रवाना व्ह्यो भारत रा झण्डा वाळो जहाज जग लाडकी हिफाजत सागे भारत ओडी बढ रह्यो है । श्री सिन्हा बतायो के फारस री खाड़ी हलका मांय भारत रा सगळा नाविक हिफाजत सागे है अर लारला 24 घंटां मांय कोई अनहोनी नी व्ही है । विदेश मंत्रालय रा प्रवक्ता रणधीर जायसवाल बतायो के तेहरान मांय भारत रा दूतावास री मदद रे पाण ईरान मांय मौजूद भारत रा करीब साढे पांच सौ जणा आर्मेनिया मांय, जद के 90 जणा अजरबैजान मांय दाखिल व्हे ग्या है । श्री जायसवाल बतायो के वठे भारत रो दूतावास काम कर रह्यो है । वे कह्यो के लारला कुछ दिनां ऊँ तेहरान ऊँ बाहर फंस्योडा विद्यार्थियां ने हिफाजत वाळा शहरां मांय कामयाबी सागे भेजी ज्या है ।

000

ई बीचे प्रदेश मांय रसोई गैस री टंकियां होटल-ढाबां माथे काम लेवण री रोकथाम सारु प्रशासन लगातार कार्यवाही कर रह्यो है । बीकानेर मांय रसद विभाग रसोई गैस री 38 टंकियां, गैस भरण री मोटर अर तोलण रो कांटो बरामद कीनो ।

जिला रसद अधिकारी बतायो के कलेक्टर रा दफतर रा पिछाड़ी चलायी जा रही चाट री स्टॉलां चलावण वाळा रे खिलाफ ई कार्रवाई करी ज्यी है । वठे ऊँ रसोई गैस री गैर कानूनी तरीका ऊँ काम ली जा रही 8 टंकियां जब्त करी ज्यी ।

000

देश मांय साल 2017-18 रा 52 फीसदी रे मुकाबले खुद रो काम धंधो करण वाळां री तादाद बध र 58 फीसदी व्हे ग्यी है। केंद्रीय श्रम अर रोजगार मंत्री मनसुख मांडविया आज नई दिल्ली मांय आ जाणकारी दीनी। वे बतायो के दिहाड़ी मजूरां री रोजीना री औसत मजूरी साल 2017-18 रा 295 रुपया ऊँ बध र अब 418 रुपया रोजीना व्हे ग्यी है। श्री मांडविया कह्यो के नुवी श्रम संहिता रे मुजब कम ती कम जरूरी मजूरी तैय करी ज्यी है अर सगळा राज्यां ने इण ऊँ बत्ती मजूरी देवणी व्हेला।

000

मुख्यमंत्री भजन लाल शर्मा आज डूंगरपुर जिला रा बेणेश्वर धाम मांय राख्यी ज्या राज्य स्तर रा राजस्थानी जनजातीय गौरव दिवस रा जळसा मांय विकास रा 1 हजार 900 करोड़ रुपया रा खर्च वाळा 326 कामां री सरुआत कीनी अर पूरा व्ह्या काम जनता ने सूप्या। आं परियोजनावां रो फायदो जनजाति रा लोगां री बत्ती तादाद वाळा डूंगरपुर, बांसवाड़ा अर प्रतापगढ़ सरीखा जिलां ने मिलेला। ई मौके राख्यी ज्या कार्यक्रम मांय मुख्यमंत्री कह्यो के राजस्थान री बरकत मांय जनजातीय समाज रो घणो खास योगदान रह्यो है अर सरकार जनजातीय हलकां रा पूरा विकास सारू गंभीरता ऊँ काम कर रही है। वे कह्यो के भणार्ई-लिखार्ई, स्वास्थ्य, नौकरी-धंधा अर बुनियादी ढांचा ने मजबूत बणावण सारू लगातार योजनावां चलायी जा रही है। मुख्यमंत्री कह्यो के एक जिला-एक पर्यटन योजना रा तैत बेणेश्वर धाम ने धार्मिक पर्यटन रा मोटा केंद्र रा तौर ऊँ विकसित कर्यो जावेला। श्री शर्मा कह्यो के ई सारू 130 करोड़ रुपया री योजना बणायी ज्यी है, ज्यीं रा तैत वटे बुनियादी सुबीता बेहतर बणाया जावेला अर पर्यटन ने बधावो दियो जावेला।

000

कार्यक्रम मांय मुख्यमंत्री होशियार टाबरियां ने स्कूटी दीनी अर महिला स्वयं सहायता समूहां री लखपति दीदियां ने टैबलेट अर कर्ज री मंजूरी ऊँ जुड्या कागजात ई दीना। ई मौके वे कह्यो के महिलावां ने माली तौर ऊँ मजबूत बणावणो राज्य रा विकास री मजबूत नींव है। श्री शर्मा वाल्मिकी मंदिर अर हरी मंदिर मांय दर्शन कीना अर जनजातीय गौरव दिवस माथे लगायी ज्यी प्रदर्शनी ने निरखी। राजस्थान दिवस समारोह रा तैत राख्या जा रह्या कार्यक्रमां री कड़ी मांय काल युवा शक्ति दिवस मणायो जावेला। इण रो राज्य स्तर रो जळसो जयपुर मांय राख्यो जावेला।

000

प्रदेश मांय रबी विपणन वर्ष 2026-27 रा तैत सरकारी मोल माथे सरसों अर चणा री खरीदी सारू 20 मार्च ऊँ नाम मण्डाया जा सकेला। नाम मण्डायोड़ा किसान अ साखां 1 अप्रैल ऊँ सरकार ने बेच सकेला। सरकार चणा रो सरकारी मोल 5 हजार 875 रुपया प्रति क्विंटल अर सरसों रो मोल 6 हजार 200 रुपया प्रति क्विंटल तैय कीनो है। किसानां रा सुबीता अर खरीदी ऊँ जुड़ी किण ई समस्या रा निपटारा सारू मुफ्त हेल्पलाइन नंबर 1800-180-6001 माथे फोन कर्यो जा सके है। जयपुर जिला मांय सरसों अर चणा री सरकारी मोल माथे खरीदी सारू 42 खरीद केन्द्र बणायी ज्या है।

000

आज राष्ट्रीय टीकाकरण दिवस बणायी ज्यो। भारत रो टीका लगावण रो कार्यक्रम दुनिया मांय जनता रा स्वास्थ्य री देखभाल ऊँ जुड़ी मोटी स्वास्थ्य पहलां मांय शामिल है, ज्यीं रा तैत हर साल 2 करोड़ ऊँ बत्ता नान्हा टाबर-टाबरियां अर आस वाळी करीब 3 करोड़ महिलावां ने 12 ऊँ बत्ती जानलेवा बीमारियां ऊँ बचावण वाळा बीसीजी, ओपीवी, पेंटावैलेंट, रोटा वायरस, खसरा-रूबेला अर सर्वाइकल कैसर ऊँ बचाव सारू लारला दिनां सरू करी ज्या एचपीवी सरीखा टीका मुफ्त लगाया जावे है। साल 2024-25 मांय टीका लगावण री रेट 51 दशमलव 8 फीसदी व्हे जावण सागे ई प्रदेश टीका लगावण रा हलका मांय खास उपलब्धि हासिल कीनी है। डीग रा प्रजनन अर बाल स्वास्थ्य अधिकारी डॉ. धर्मवीर सिंह बतायो के राष्ट्रीय टीकाकरण कार्यक्रम रा तैत खास तौर ऊँ आस वाळी महिलावां अर बच्चां रे टीका लगावण माथे जोर दियो जावे है।

0000

उपमुख्यमंत्री दिया कुमारी आज नई दिल्ली मांय न्यारा-न्यारा केन्द्रीय मंत्रियां सागे मुलाकात कर र प्रदेश रा विकास ऊँ जुड़ी योजनावां रा बारा मांय चर्चा कीनी। उपमुख्यमंत्री केन्द्रीय सड़क परिवहन मंत्री नितिन गडकरी ऊँ मिल र नेशनल हाई-वे ने और बधावण अर बेहतर जुड़ाव सरीखा खास मुद्दां माथे बातचीत कीनी। दिया कुमारी केन्द्रीय संस्कृति अर पर्यटन मंत्री गजेन्द्र सिंह शेखावत सागे मीटिंग कर र राज्य मांय सैर-सपाटा री संभावनावां अर केन्द्रीय कानून मंत्री अर्जुनराम मेघवाल सागे भेंट कर र राज्य मांय सुलभ न्याय मुहैया करावण री कोशिशं रा बारा मांय चर्चा कीनी। रेल मंत्री अश्विनी वैष्णव सागे चर्चा रे दौरान वे प्रदेश री जनता ने बेहतर रेल सुबीता मुहैया करावण रा बारा मांय बातचीत कीनी। उपमुख्यमंत्री केन्द्रीय महिला अर बाल विकास मंत्री अन्नपूर्णा देवी अर लोकसभा अध्यक्ष ओम बिरला सागे ई मुलाकात कीनी।

000

उत्तर भारत री शक्तिपीठ कैला देवी रो सालाना मेळो आज सरु व्हयो। 1 अप्रैल ताई चालण वाळा ई मेळा मांय प्रदेश अर देश रा केई राज्यां ऊँ मोटी तादाद मांय जातरु माता रा दर्शन सारु पूग रह्या है। जिला कलेक्टर नीलाभ सक्सेना बतायो के मेळा मांय मोटी तादाद मांय आवण वाळा जातरुआं रा सुबीता सारु प्रशासन जरुरी इन्तेजाम कीना है। वे बतायो के करीब साढे तीन सौ सुरक्षा कर्मचारी तैनात करी ज्या है, 200 और सफाई कर्मचारी अर 320 सीसीटीवी कैमरा लगायी ज्या है। जिला कलेक्टर बतायो के जातरुआं रा सुबीता सारु रोडवेज री 300 और बसां चलायी जा रही है।

पाली जिला रा देसूरी कने सोनाणा गांव मांय ई काल खेतला जी जूनी धाम रो मेळो सरु व्हेला। तीन दिन रा ई मेळा मांय महाआरती सागे गेर-नाच अर भजन संध्या रा कार्यक्रम राख्या जावेला।

000